

# STJÓRNARTÍÐINDI B 109 – 2000

19. október 2000

2101

Nr. 741

## AUGLÝSING

### um deiliskipulag og breytingu á deiliskipulagi í Reykjavík.

#### *Hálsahverfi – deiliskipulag.*

Í samræmi við skipulags- og byggingarlög hefur borgarráð Reykjavíkur þann 26. september 2000 samþykkt deiliskipulag fyrir Hálsahverfi.

Uppdrættir hafa hlotið þá meðferð sem skipulags- og byggingarlög mæla fyrir um. Skipulagið öðlast þegar gildi.

#### *Hjarðarhagi 45-47-49 – breytt skipulag.*

Í samræmi við skipulags- og byggingarlög hefur borgarstjórn Reykjavíkur þann 21. september 2000 samþykkt breytingu á skipulagi lóðar nr. 45-47-49 við Hjarðarhaga.

Einnar hæðar viðbygging verður byggð við vesturhlið húss og byggð hæð ofan á hús nr. 47 og 49.

Uppdrættir hafa hlotið þá meðferð sem skipulags- og byggingarlög mæla fyrir um. Skipulagsbreytingin öðlast þegar gildi.

*Reykjavík, 19. október 2000.*

**Þorvaldur S. Þorvaldsson** skipulagsstjóri.

19. október 2000

Nr. 742

## REGLUR

### um gjaldeyrismarkað.

Reglur þessar eru settar skv. heimild í 18. gr. laga nr. 36/1986 um Seðlabanka Íslands með áorðnum breytingum, sbr. og ákvæði 8. gr. laga nr. 87/1992 um gjaldeyrismál.

1. gr.

#### *Aðild að millibankamarkaði með gjaldeyri.*

Aðilar að millibankamarkaði með gjaldeyri (markaðsaðilar) geta þeir orðið, auk Seðlabanka Íslands, sem hafa ótakmarkað starfsleyfi til gjaldeyrisviðskipta á grundvelli 2. mgr. 8. gr. laga nr. 87/1992, sbr. 1. mgr. 9. gr. reglugerðar nr. 679/1994, enda taki þeir á sig ábyrgð og skyldur viðskiptavaka með Bandaríkjadal gagnvart íslenskri krónu samkvæmt ákvæðum þessara reglna. Nefndir aðilar auk ríkissjóðs hafa einir rétt til gjaldeyrisviðskipta við Seðlabankann.

Sækja þarf skriflega til Seðlabanka Íslands um að verða viðskiptavaki á gjaldeyrismarkaði skv. reglum þessum. Seðlabankinn sendir skriflegt svar við fullbúinni umsókn innan eins mánaðar frá því að hún berst. Samþykki bankinn umsóknina tilkynnir hann það öllum aðilum á markaðnum fimm viðskiptadögum áður en aðild umsækjanda tekur gildi.

Um uppsögn viðskiptavaka er fjallað í 13. gr.

## 2. gr.

### *Skyldur viðskiptavaka.*

Viðskiptavaka er skylt að gefa upp bindandi kaup- og söluverð Bandaríkjadals ef annar markaðsaðili óskar þess. Sé fjárhæð eigi tilgreind skal viðskiptavaki miða við 1.500.000 Bandaríkjadali, og er honum skylt að eiga viðskipti fyrir þá fjárhæð á tilgreindu verði. Hafi markaðsaðili aðra fjárhæð í huga skal hann tilgreina hana, en þarf ekki að segja til um hvort hann vill kaupa eða selja. Viðskiptavaka er ekki skylt að láta uppi verð fyrir aðra fjárhæð en 1.500.000 Bandaríkjadali. Að loknum viðskiptum er viðskiptavaka ekki skylt að gefa sama markaðsaðila verðtilboð aftur fyrir en eftir 5 mínútur. Seðlabanki Íslands er undanþeginn þessu ákvæði og eru engin tímamörk á viðskiptum sem Seðlabankinn á frumkvæði að.

Viðskipti í öðrum gjaldmiðli en Bandaríkjadal eru háð samþykki beggja aðila, og getur viðskiptavaki þá vikist undan að gefa upp verð þótt þess sé óskað.

## 3. gr.

### *Markaðstími.*

Millibankamarkaður með gjaldeyri stendur frá kl. 9.15 til 16.00 hvern viðskiptadag.

## 4. gr.

### *Leiðbeinandi verðtilboð.*

Viðskiptavakar skuldbinda sig til þess að uppfæra reglulega leiðbeinandi verðtilboð, þ.e. kaup- og sölugengi Bandaríkjadals, á sérstakri síðu í upplýsingakerfi Reuters, Telerate, eða í öðru sambærilegu upplýsingakerfi, sem markaðsaðilar koma sér saman um að notað sé fyrir markaðinn. Einungis markaðsaðilar skulu hafa aðgang að þessum síðum. Leiðbeinandi verð skal uppfæra eigi sjaldnar en á 30 sekúndna fresti. Þar skal að öðru jöfnu sýnt það verð sem viðskiptavaki er reiðubúinn að kaupa og selja 1.500.000 Bandaríkjadali á.

## 5. gr.

### *Upplýsingakvöð viðskiptavaka.*

Viðskiptavaki, sem gefið hefur upp verð er leitt hefur til viðskipta, skal tilkynna Seðlabanka Íslands símleiðis, með „Reuter-mail“ eða eftir öðrum sambærilegum boðleiðum um viðskipti sem nema 500.000 Bandaríkjadölum eða meira eða jafngildi þess í öðrum gjaldmiðli eigi síðar en 5 mínútum eftir að viðskipti hafa átt sér stað. Þar skal koma fram í hvaða gjaldmiðli viðskiptin fóru fram, hver mótaðili var, fjárhæð og verð (gengi). Seðlabankinn ákveður hvaða boðleið skuli notuð í þessu skyni.

Viðskiptavakar skulu jafnframt skila Seðlabanka Íslands tvenns konar yfirliti, daglegu og mánaðarlegu, um gjaldeyrisviðskipti á millibankamarkaði og gjaldeyrisjöfnuð – í því formi sem Seðlabankinn mælir fyrir um. Upplýsingar vegna hvers viðskiptadags skulu berast fyrir kl. 14.00 næsta dag, en yfirlit um hvern mánuð eigi síðar en kl. 16.00 sjöunda virkan dag næsta mánaðar.

Viðskiptavökum ber einnig að veita Seðlabanka Íslands símleiðis aðrar upplýsingar um viðskipti og annað það sem líklegt er til þess að hafa umtalsverð áhrif á markaðinn. Viðskiptavökum ber að veita slíkum símtölum eðlilegan forgang.

## 6. gr.

*Upplýsingavöð Seðlabanka Íslands.*

Í tengslum við ákvörðun opinbers viðmiðunargengis birtir Seðlabanki Íslands vísitölu gengisskráningar einu sinni á dag á Reutersíðu og/eða í öðru sambærilegu upplýsingakerfi.

Seðlabanki Íslands sendir reglulega öllum viðskiptavökum upplýsingar um heildarviðskipti á millibankamarkaði með gjaldeyri.

## 7. gr.

*Skráning opinbers viðmiðunargengis.*

Seðlabanki Íslands skráir gengisvísitölu og opinbert viðmiðunargengi íslensku krónunnar með hliðsjón af leiðbeinandi verðtilboðum viðskiptavaka eða því verði sem myndast hefur í viðskiptum Seðlabankans og viðskiptavaka. Hvern viðskiptadag milli kl. 10.45 og 11.00 skoðar Seðlabankinn tilboð allra viðskiptavaka, reiknar út miðgengi Bandaríkjadals, skráir opinbert viðmiðunargengi á þeim grundvelli og reiknar út gengi annarra gjaldmiðla í hinni opinberu gengisskráningu sinni. Enn fremur getur Seðlabanki skráð opinbert viðmiðunargengi á grundvelli síðasta viðskiptaverðs á þessu tímabili.

Seðlabanki Íslands ákveður hvaða gjaldmiðlar verða skráðir í opinberu viðmiðunargengi og birtir kaup- og sölugengi þeirra. Gengisbil hvers gjaldmiðils skal taka mið af meðalgengisbili almenns gengis allra viðskiptavaka í sama gjaldmiðli og skal endurskoðað mánadaglega. Gengisbili Seðlabankans verður þó aðeins breytt ef gildandi gengisbil bankans vîkur frá meðalgengisbili almenns gengis viðskiptavaka um meira en 0,05 af hundraði. Gengisbil gjaldmiðla frá löndum Efnahags- og myntbandalags Evrópu skal vera hið sama og gengisbil evru.

## 8. gr.

*Viðskipti Seðlabanka Íslands.*

Seðlabanka Íslands er ekki skylt að eiga viðskipti við aðra markaðsaðila þótt eftir því sé leitað. Viðskiptavaka er hinsvegar skylt að eiga viðskipti við bankann í samræmi við reglur þessar.

## 9. gr.

*Gengisbil í viðskiptum.*

Viðskiptavakar skulu gera með sér samkomulag um hámarksgengisbil í tilboðum sínum með 1.500.000 Bandaríkjadali á millibankamarkaði. Gengisbil skal vera hlutfallslega svipað í öðrum gjaldmiðli. Gildandi samkomulag viðskiptavaka, dagsett 20. október 2000, um hámarksgengisbil er fylgiskjal með þessum reglum. Samhljóða ákvörðun viðskiptavaka þarf til að gera breytingar á samkomulagi um hámarksgengisbil.

Viðskiptavökum er heimilt að hliðra til verðtilboðum með ofangreindu gengisbili, m.a. til þess að lýsa áhuga á gjaldeyrisviðskiptum.

Viðskiptavakar skulu nota sama fjölda aukastafa í verðtilboðum og gert er við skráningu opinbers viðmiðunargengis hjá Seðlabanka Íslands.

## 10. gr.

*Gildisdagsetning viðskipta.*

Í viðskiptum með erlendan gjaldeyri skulu gilda sömu reglur og á erlendum gjaldeyrisörkuðum um gildisdagsetningar og millifærslur á erlenda bankareikninga.

## 11. gr.

*Hæfniskröfur.*

Viðskiptavakar skulu sjá til þess að starfsmenn þeirra, sem annast viðskipti á millibankamarkaði, hafi næga þekkingu til að annast gjaldeyrisviðskipti. Viðskiptavakar skulu hafa yfir að ráða fullnægjandi innri eftirlitskerfum til að meta og stýra áhættu í gjaldeyrisviðskiptum. Þá skal innra skipulag viðskiptavaka vera þannig að skýr skil séu milli gjaldeyrisviðskipta og frágangs þeirra. Ef þess er óskað skal viðskiptavaki veita Seðlabanka Íslands upplýsingar um eftirlitskerfi og innri reglur sem viðskiptavaki hefur sett sér í gjaldeyrisviðskiptum. Ef starfsemi viðskiptavaka tekur breytingum eða skipt er um yfirmenn gjaldeyrisviðskipta skal Seðlabankanum tilkynnt um slíkt fyrirfram. Jafnframt skulu viðskiptavakar tilkynna Seðlabankanum um hverjir sinna gjaldeyrisviðskiptum á millibankamarkaði fyrir þeirra hönd.

## 12. gr.

*Fundir markaðsaðila, siðareglur o.fl.*

Viðskiptavakar skulu tilnefna tengiliði vegna samskipta við Seðlabanka Íslands og skal við það miðað að þeir séu yfirmenn gjaldeyrisviðskipta viðskiptavaka. Með reglulegu millibili skal Seðlabankinn boða til funda tengiliða, þar sem fjallað verður um leikreglur markaðarins. Markaðsaðilar skulu stuðla að heilbrigðum viðskiptaháttum, m.a. með því að setja siðareglur fyrir millibankamarkað með gjaldeyri með hliðsjón af alþjóðlegum siðareglum.

Viðskiptavakar skulu fylgjast með öllum vísbendingum um óeðlilegt atferli að því er varðar umfang, tíðni og frágang viðskipta og tilkynna Seðlabanka Íslands um slíkt verði þeir þess áskynja og enn fremur um hvaðeina annað sem óeðlilegt gæti talist.

## 13. gr.

*Uppsögn viðskiptavaka og viðurlög.*

Viðskiptavaki, sem hyggst segja upp aðild að millibankamarkaði samkvæmt reglum þessum, skal tilkynna Seðlabanka Íslands þá ákvörðun skriflega með a.m.k. mánaðar fyrirvara.

Telji Seðlabanki Íslands að viðskiptavaki standi ekki við skuldbindingar sínar samkvæmt reglum þessum getur bankinn svipt hann rétti til viðskipta við sig.

## 14. gr.

*Neyðarviðbrögð.*

Verði búnaður sá sem notaður er við tilboð og viðskipti óstarfhæfur um tíma, getur Seðlabanki Íslands án fyrirvara ákveðið að viðskipti skuli fara fram með öðrum hætti en lýst er í reglum þessum og skal öllum aðilum að markaðnum tilkynnt um það án tafar.

## 15. gr.

*Gildistaka.*

Reglur þessar öðlast gildi hinn 20. október 2000. Jafnframt falla þá úr gildi reglur nr. 838 frá 8. desember 1999 um gjaldeyrismarkað.

## 16. gr.

*Ákvæði til bráðabirgða.*

Samkomulag er um að notast verði við upplýsingakerfi Reuters vegna leiðbeinandi verðtilboða, sbr. 4. gr. og Reuter-mail vegna upplýsingagjafar skv. 5. gr. Þá er samkomulag um að viðskiptavakar leiti leiða til að upplýsingar um millibankaviðskipti á gjaldeyris-

markaðnum berist beint úr viðskiptakerfum viðskiptavaka til Seðlabanka Íslands með raf-rænum hætti fyrir 1. júní 2001.

Reykjavík, 19. október 2000.

*Seðlabanki Íslands,*

**Birgir Ísl. Gunnarsson.**

**Eiríkur Guðnason.**

**Finnur Ingólfsson.**

### Fylgiskjal.

#### **Samkomulag um gengisbil á millibankamarkaði með gjaldeyri.**

Viðskiptavakar á gjaldeyrismarkaði gera með sér svofellt samkomulag um gengisbil, sbr. 9. gr. reglna Seðlabanka Íslands um gjaldeyrismarkað, nú frá 19. október 2000.

1. Hámarksgengisbil í tilboðum skv. 1. mgr. 2. gr. reglnanna skal vera 7 aurar. Viðskiptavakar skulu eigi að síður miða við að gengisbil verði að jafnaði 5 aurar nema aðstæður á markaðnum séu óvenjulegar.
2. Breytist gengisvísitala íslensku krónunnar meira en 1,25% frá opnunargildi dagsins, sem birt er á síðu Seðlabankans á REUTERS (ISKTW=SEDL), skal hámarksgengisbil hækkað í 10 aura til loka dags.
3. Verði meiri breyting á gengisvísitölu íslensku krónunnar en sem nemur 2% frá opnunargildi dagsins, sem birt er á síðu Seðlabankans á REUTERS (ISKTW=SEDL), skal hámarksgengisbil hækka í 20 aura til loka dags.
4. Fyrsta grein samkomulags þessa skal endurskoðuð að mánuði liðnum frá undirskrift samkomulags þessa. Reynist gengisbil í tilboðum viðskiptavaka almennt hafa hækkað í hámark það sem tilgreint er í 1. gr. skal hámarksgengisbilið lækkað í 6 aura og gildir það uns annað verður ákveðið af viðskiptavökum.
5. Nýir viðskiptavakar skulu gerast aðilar að þessu samkomulagi með sérstakri yfirlýsingu samhliða því sem þeir sækja um aðild að gjaldeyrismarkaðnum, sbr. 1. mgr. 1. gr. reglna um gjaldeyrismarkað.

*Reykjavík, 20. október 2000.*

**Búnaðarbanki Íslands hf.**

**Kaupping hf.**

**Íslandsbanki – FBA hf.**

**Landsbanki Íslands hf.**